


Na osnovu člana 158. Zakona o visokom obrazovanju ("Službene novine Kantona Sarajevo", broj: 42/13-Prečišćeni tekst i 13/15)



VLADA KANTONA SARAJEVO

sa sjedištem u Sarajevu, ulica Reisa Džemaludina Čauševića br. 1,
koju zastupa Elmedin Konaković, premijer
i

ISLAMSKA ZAJEDNICA U BOSNI I HERCEGOVINI

sa sjedištem u Sarajevu, ulica Zelenih beretki br. 17,
koju zastupa Husein ef. Kavazović, reisu-l-ulema

(u daljem tekstu: Ugovorne strane)

U Sarajevu, dana 27.10.2016. godine, zaključili su

UGOVOR

**O POLOŽAJU I DJELOVANJU FAKULTETA ISLAMSKIH NAUKA U SARAJEVU
U SASTAVU UNIVERZITETA U SARAJEVU**

**Član 1.
(Članstvo u Univerzitetu)**

- (1) Fakultet islamskih nauka u Sarajevu (u daljnjem tekstu: FIN) je u skladu sa Zakonom o visokom obrazovanju u svom sadašnjem statusu punopravna članica Univerziteta u Sarajevu (u daljnjem tekstu: Univerzitet).
- (2) FIN zadržava svojstvo pravnog lica u skladu sa zakonom i Statutom Univerziteta.
- (3) Ugovorne strane su saglasne da FIN, kao visoka naučno-obrazovna ustanova vjerskog karaktera, ustanovljena od Islamske zajednice u Bosni i Hercegovini, nastavi obavljati svoju djelatnost u sastavu Univerziteta kao punopravna članica, u skladu sa propisima koji reguliraju organizaciju i funkcioniranje Univerziteta i djelatnost visokog obrazovanja na području Kantona Sarajevo (u daljnjem tekstu: Kanton).

Član 2.
(Osnivačka prava)

Islamska zajednica u Bosni i Hercegovini zadržava osnivačka i upravljačka prava nad FIN-om u skladu sa odredbama Zakona o slobodi vjere i pravnom položaju crkava i vjerskih zajednica u Bosni i Hercegovini („Službeni glasnik Bosne i Hercegovine“, broj: 5/04).

Član 3.
(Naziv)

Puni naziv Fakulteta islamskih nauka glasi: „Univerzitet u Sarajevu – Fakultet islamskih nauka“.

Član 4.
(Opći akti)

- (1) FIN će donijeti pravila u skladu sa pozitivnim zakonskim propisima i propisima Islamske zajednice u Bosni i Hercegovini.
- (2) Na pravila iz stava (1) ovog člana saglasnost daje Ministarstvo za obrazovanje, nauku i mlade Kantona Sarajevo (u daljnjem tekstu: Ministarstvo) uz prethodno pribavljenu saglasnost Univerziteta i Rijasetu Islamske zajednice u Bosni i Hercegovini.
- (3) Opći akt kojim se uređuje unutrašnja organizacija i djelovanje FIN-a mora biti u saglasnosti sa zakonom i Statutom Univerziteta odnosno drugim općim aktima Univerziteta, pri čemu se uvažava autonomija i posebnost FIN-a.
- (4) FIN će opći akt iz stava (3) ovog člana i pravila iz stava (1) ovog člana donijeti odnosno uskladiti sa zakonom, Statutom Univerziteta i ovim ugovorom u roku od šest mjeseci od dana stupanja na snagu ovog ugovora.

Član 5.
(Prava i obaveze)

- (1) Kao punopravna članica Univerziteta, stupanjem na snagu ovog ugovora FIN između ostalog stiče mogućnost:
 - a) realiziranja zajedničkih studijskih programa s ostalim članicama Univerziteta;
 - b) sudjelovanja u istraživačkim projektima i programima razmjene u kojima se Univerzitet pojavljuje kao nositelj, posrednik ili sudionik;
 - c) potpunoga korištenja informacijskog i bibliotečkoga sistema Univerziteta.
- (2) FIN Univerzitetu stavlja na raspolaganje svoje knjižnične i informacijske kapacitete.

Član 6.
(Osoblje i studenti)

Akademsko i neakademsko osoblje te studenti FIN-a imaju sva prava i obaveze propisane Zakonom o visokom obrazovanju, Statutom Univerziteta, pravilima i općim aktom FIN-a.

Član 7.
(Broj studenata i utvrđivanje cijene studija)

- (1) Vlada Kantona Sarajevo (u daljnjem tekstu: Vlada) donosi odluku o broju i strukturi studenata koji se upisuju u prvu studijsku godinu prvog i drugog ciklusa studija na prijedlog FIN-a i Univerziteta.
- (2) Cijenu studija za studente koji sami finansiraju svoj studij na FIN-u utvrđuje Vlada na prijedlog Univerziteta, koji je prethodno usaglašen sa FIN-om i Rijasetom Islamske zajednice u Bosni i Hercegovini.

Član 8.
(Diplome)

- (1) Studentima koji uspješno okončaju studij na FIN-u, diplomu o završenom studiju dodjeljuje Univerzitet, a istu potpisuje rektor Univerziteta, reisu-l-ulema i dekan FIN-a.
- (2) U postupku utvrđivanja sadržaja i izgleda diploma, kao i dodjele diploma poštovaće se specifičnosti FIN-a.

Član 9.
(Izbor u akademska zvanja)

- (1) Izbor u akademska zvanja na FIN-u vrši se u skladu sa Zakonom o visokom obrazovanju, Statutom Univerziteta, pravilima i općim aktom FIN-a.
- (2) Odluku o izboru u akademsko zvanje donosi Senat Univerziteta na prijedlog Nastavno-naučnog vijeća FIN-a.
- (3) U postupku izbora člana akademskog osoblja, FIN je obavezan za kandidata predloženog za izbor privabiti ovlaštenje (*muraselu*) od reisu-l-uleme Islamske zajednice u Bosni i Hercegovini, a što je u skladu s Ustavom Islamske zajednice u Bosni i Hercegovini.
- (4) Reisu-l-ulema Islamske zajednice u u Bosni i Hercegovini može, zbog razloga koji se tiču vjere i morala, a na prijedlog Nastavno-naučnog vijeća FIN-a, članu akademskog osoblja

uskratiti ili opozvati ovlaštenje (*murasetu*) čime taj član akademskog osoblja gubi mogućnost daljnjeg učestvovanja u nastavnom procesu na FIN-u.

Član 10.
(Raniji izbori u akademska zvanja)

- (1) Univerzitet priznaje sve dosadašnje izbore u akademska zvanja na FIN-u.
- (2) Započeti izbori u akademska zvanja na FIN-u završit će se prema propisima prema kojima su započeti.
- (3) Nakon isteka izbornog perioda članova akademskog osoblja iz stava (2) ovog člana, izbor u akademska zvanja će se vršiti prema odredbama Zakona o visokom obrazovanju, Statuta Univerziteta i ovog ugovora.

Član 11.
(Nastavni planovi i programi)

- (1) Univerzitet donosi nastavne planove i programe FIN-a na prijedlog Nastavno-naučnog vijeća FIN-a uz prethodnu saglasnost Rijasetu Islamske zajednice u Bosni i Hercegovini.
- (2) Za vjerske predmete u okviru nastavnog plana i programa FIN-a, Univerzitet usvaja plan i program tih predmeta, bez ingerencije da ih mijenja ili ukida.
- (3) FIN je obavezan u obrazloženju nastavnog plana i programa navesti koji nastavni predmeti su vjerske prirode u skladu sa stavom (2) ovog člana.
- (4) Izmjene i dopune nastavnog plana i programa vrše se po proceduri koja važi za njegovo donošenje.

Član 12.
(Komisije za doktorske disertacije)

Imenovanje komisija u postupku sticanja akademske titule odnosno zvanja doktora nauka vrši Senat Univerziteta na prijedlog FIN-a.

Član 13.
(Izbor i imenovanje dekana)

- (1) Nastavno-naučno vijeće FIN-a, prema proceduri utvrđenoj Zakonom o visokom obrazovanju, Statutom Univerziteta i pravilima FIN-a bira i imenuje dekana.
- (2) U skladu sa Ustavom Islamske zajednice u Bosni i Hercegovini, Rijaset Islamske zajednice u Bosni i Hercegovini daje saglasnost na izbor dekana.

- (3) Nakon pribavljene saglasnosti Rijasetu Islamske zajednice u Bosni i Hercegovini, FIN dostavlja rektoru Univerziteta odluku o imenovanju dekana na potpis.
- (4) Rektor Univerziteta je obavezan potpisati rješenje o imenovanju i isto proslijediti FIN-u radi dostavljanja obavještenja o tome prijavljenim kandidatima i to najkasnije sedam dana od dana prijema rješenja na potpis.

Član 14.
(Vlasnički odnosi)

- (1) Islamska zajednica u Bosni i Hercegovini zadržava pravo vlasništva nad imovinom FIN-a.
- (2) FIN-u će pripadati i ona imovina koju stekne od Islamske zajednice u Bosni i Hercegovini ili poklona i zavještanja trećih lica nakon potpisivanja ovog ugovora.

Član 15.
(Sufinansiranje)

Do donošenja odluke o kriterijima za sufinansiranje Univerziteta u Sarajevu i njegovih organizacionih jedinica te metodologije za raspodjelu budžetskih sredstava, sufinansiranje rada FIN-a od strane Kantona Sarajevo vršit će se u skladu sa Zakonom o visokom obrazovanju odnosno Zaključkom Senata Univerziteta usvojenom na vanrednoj sjednici od 17.03.2014. godine, Zaključkom Upravnog odbora Univerziteta, broj: 02-38-1102/14 od 27.03.2014. godine i odlukom Upravnog odbora Univerziteta, broj: 02-38-1001-1/14 od 15.05.2014. godine.

Član 16.
(Rješavanje nesporazuma)

Eventualne nesporazume ili poteškoće u provođenju i tumačenju odredbi ovog ugovora rješavat će posebna komisija koju imenuje Vlada, a koju čine rektor Univerziteta (u ime Univerziteta), reisu-l-ulema (u ime Rijasetu Islamske zajednice u Bosni i Hercegovini) odnosno lica koja oni ovlaste i predstavnik Vlade.

Član 17.
(Primjena drugih propisa)

Za ostala pitanja koja nisu obuhvaćena ovim ugovorom, a u vezi sa položajem i djelovanjem FIN-a kao organizacione jedinice Univerziteta, primjenjuju se propisi koji u Bosni i Hercegovini i Kantonu reguliraju djelatnost visokog obrazovanja i naučnoistraživačku

djelatnost, Zakon o slobodi vjere i pravnom položaju crkava i vjerskih zajednica u Bosni i Hercegovini, Zakon o ustanovama, propisi Islamske zajednice u Bosni i Hercegovini, Statut Univerziteta i pravila FIN-a.

Član 18.
(Stupanje na snagu)

Ovaj ugovor stupa na snagu danom potpisivanja.

Član 19.
(Primjerci Ugovora)

Ovaj ugovor je sastavljen u šest (6) istovjetnih primjerka od kojih svaka ugovorna strana zadržava po dva (2) primjerka, jedan (1) primjerak dostavlja se Ministarstvu i jedan (1) primjerak Univerzitetu putem Ministarstva.



Broj: 02-38-31300/16
U Sarajevu, 27.10.2016. godine

Broj: 01-08-2-5246/16
Sarajvo, 27.10.2016.